

განვლილ შაბათს გაიმართა სსრ კავშირის საფეხბურთო ჩემპიონატის 22-ე ტურის მატჩები.

ჩვენი ყურადღება, რა თქმა უნდა მიჰყვრობილი იყო ერევნის სტადიონისკენ, სადაც თბილისის „დინამო“ „არარატს“ ხვდებოდა. მაგრამ ამავე ტურში ფრიად საყურადღებო იყო ღონეცკის „შახტიორის“ შეხვედრა დნეპროპეტროვსკში, ალმა-ათის „კაირატისა“ - კიევი და მინსკის დინამოელებისა შინ - მოსკოვის „ლოკომოტივთან“. რაც შეეხება ბაქოს „ნეფთჩისა“ და მოსკოვის „დინამოს“ მატჩს, იგი 7 ოქტომბრისთვის გადაიდო.

ზემოთ ჩამოთვლილ მატჩებში ღონეცკელებმა და ალმა-ათელებმა მარცხი იწვეს, მინსკის „დინამომ“ შინ 2 ქულა აიღო.

„არარატი“ (ერევანი) - „დინამო“ (თბილისი) 3:1 (2:0).

ერევანი. „რაზდანის“ სტადიონი. 3 სექტემბერი.

„არარატი“: პოდშივალოვი, სუქიასიანი (მარქოსიანი, 65), ვ. ხაჩატრიანი, ა. ხაჩატრიანი, პოვანესიანი, ენგიბარიანი, ოვსეფიანი, მელქონიანი, ქოცარიანი, ალაიანი, ვერანიანი (აივაზიანი, 84).

„დინამო“: გაბელია, კეტაშვილი, ცხადაძე, ჭელია, არზიანი, რევიშვილი, სვანაძე, სულაქველიძე (ცეიბა, 37), ცაავა, ფანცულაია, გოგიჩაიშვილი (ვ. ჯიშკარიანი, 58)

მსაჯი ა. სპირინი (მოსკოვი).

გაათრთხილეს რევიშვილი, ენგიბარიანი.

ღუბლიორები - 1:0.

ამ მატჩამდე „არარატს“ 18 ქულა ჰქონდა, „დინამოს“ – 16. გამარჯვების შემთხვევაში თბილისელები მეტოქეს ქულებით უთანაბრდებოდნენ, მაგრამ მოგებათა საერთო რაოდენობით უსწრებდნენ და მასზე წინ ინაცვლებდნენ. დინამოელები მინდორზე თითქმის იმავე შემადგენლობით გამოვიდნენ, როგორც წინა მატჩებში, როცა მათ ზედიზედ აიღეს ფრიად საჭირო ქულები. „არარატის“ მწვრთნელებმა კი გუნდის რიგებში მნიშვნელოვანი ცვლილებები მოახდინეს. ბრძოლამ პირველივე წუთებიდან უკიდურესად დაძაბული ფორმები მიიღო. თბილისელები შებოჭილად თამაშობდნენ, ერევნელები კი თითოეულ ორთაბრძოლას გადამწყვეტ მნიშვნელობას ანიჭებდნენ და თანდათან ცხადად გამოირკვა, რომ ერევნელები ყოველ ცალკეულ

მომენტში უფრო სწრაფად, უფრო გაბედულად, უფრო თავგანწირვით მოქმედებდნენ. სისტემატურად ასწრებდნენ მეტოქეებს და ეს საკმარისი აღმოჩნდა საიმისოდ, რომ ინიციატივა მათ აეღოთ ხელში. გავიდა 10-15 წუთი და ნათელი გახდა, რომ სტუმრები მხოლოდ მომგერიებელთა როლში იმყოფებოდნენ, ამიტომ თამაშის ტემპს ძირითადად ერევნელები განაგებდნენ. მართალია უშუალო, პირდაპირი სახითაა მომენტები „დინამოს“ კართან ამ პერიოდში ნაკლებად იქმნებოდა, მაგრამ ტერიტორიული და სათამაშო უპირატესობა „არარატს“ ჰქონდა. თამაშიც თბილისელთა ნახევარზე მიმდინარეობდა.

პირველი გოლი მე-19 წუთზე გავიდა. ეს ასე მოხდა: ერევნელებმა შუა მინდორზე გაითამაშეს საჯარიმო, ბურთი ა. ხაჩატრიანმა მიიღო, თბილისელთა ნახევარზე გადავიდა და შორიდან, დაახლოებით 30 მეტრის მანძილიდან, მოულოდნელად და ძლიერად დაარტყა. გაბელთა წამით შეფერხდა, მერე კი უკვე ვეღარ მიუსწრო შერეულ კუთხეში გაგზავნილ ბურთს - 1:0.

დინამოელები თამაშის გარდატეხისა და აქტიური მოქმედების აუცილებლობის წინაშე აღმოჩნდნენ. მცირე ხანში მათ შეძლეს მდგომარეობის გათანაბრება, ამოქმედდნენ თავდასხმის ხაზის მოთამაშეები. თამაშმა ჯერ შუა მინდორზე და შემდეგ, „არარატის“ ნახევარზეც გადაინაცვლა, მაგრამ უკვე მაშინ, როცა ტაიმის დამთავრებას ორიოდ წუთი აკლდა, „არარატმა“ სწრაფად განახორციელა კონტრიერიში, ბურთი დინამოელთ კარის სიახლოვეს მიიღო უმეტადალყუროდ დარჩენილმა ქოცარიანმა და ზუსტად გაგზავნა მიზანში - 2:0.

2:0 - ეს უკვე საგრძნობი უპირატესობა იყო, მაგრამ შემდგომში, როცა 52-ე წუთზე მსაჯმა თბილისელთ კარში 11-მეტრიანი დანიშნა და ა. ხაჩატრიანმა ზუსტად გაიტანა ბურთი, მატჩის საბოლოო შედეგი ეჭვს უკვე აღარ იწვევდა. ერევნელებმა, მიაღწიეს რა ესოდენ სოლიდურ წარმატებას, საფუძვლიანად გაამაგრეს ნახევარდაცვისა და დაცვის ხაზები. ისინი უკვე თვითვე ცდილობდნენ დაეცხროთ ტემპი. ფეხბურთელები მეტწილად განივი გადაცემებით მოქმედებდნენ, ცდილობდნენ არ მიეცათ მეტოქისთვის სწრაფი თამაშის განვითარების საშუალება. ასეთ ვითარებაში დინამოელებმა რამდენიმე შეტევა განავითარეს, მაგრამ დანაკარგის მთლიანად ანაზღაურება მათ ძალებს აღემატებოდა. მაქსიმუმი, რაც გუნდმა შეძლო, ეს იყო ცხადაძის მიერ კეტაშვილის გადაცემით ერთადერთი საპასუხო გოლის გატანა.

საბოლოოდ, მატჩმა, რომლის შედეგსაც თბილისის „დინამოსთვის“ საუკეთესო პერსპექტივის შექმნა შეეძლო, გამარჯვება „არარატს“ მოუტანა. სამართლიანობა მოითხოვს აღინიშნოს, რომ მასპინძლებმა განსაკუთრებული მონდომებით და თავგანწირვით ითამაშეს პირველ ტაიმში. შეხვედრის ბედიც ძირითადად სწორედ მაშინ გადაწყდა.

ახლა თბილისის „დინამოს“ 8 სექტემბერს საკუთარ მინდორზე მეტად ძნელი მატჩი მოეწივს ჩემპიონატის პოტენციურ ლიდერთან კიევის „დინამოსთან“

ლელი 6.09.1988